

Attellu di scrittura di u CCU

Scritti di studenti



Amori è scimità

Gilbert Reboli

Sentu un adori chì cunnoscu, st'adori di sudori è di tabaccu, saria forse a me maddalena di Proust, mi vicu à i me primi passi in i burdeddi di Barcellona, faci un pezzu chì ùn eru vultatu quì, un pezzu chì l'idea di svacammi mi stuzzicaia a menti.

Ma mi tocca à ritruvalla, idda, l'unica donna chì devu ritruvà, a sola parsona chì accuppa u me spiritu dapoì 12 anni, 12 anni passati in gabbia.

Ùn parlu di a me mamma chì mancu ùn parlaiu quandu si n'hè andata.

Pensu à a sola donna chì t'aghju tinutu caru di tutta la me vita, l'unica chì m'hà fattu rida, chì m'hà resu a vita più bedda, m'arricordu di a prima volta chì l'aghju incuntrata un ghjornu vintosu d'aprili, u soli pichjaia com'è mai è i so

ochji
erani più
verdi ch' i pianuri
irlandesi, a so bocci più
dolci chì a seta, m'arricordu
quandu idda m'hà tuccatu par a prima
volta, u cuntattu di a so pella scuzzu-
laia tuttu u me essaru, si n'hè seguitata
dopu una passione trà i nosci animi chì
nimu ùn pudia capì, i piaceri effimeri
di a me vita passata ùn erani più chì
ricordi luntani, cridiu chì tuttu avali
ùn sarà chì gioia è amori.

Mi svegliu. Sò quattru ori passati, è
mi svegliu dopu sta notti passata in
l'abissi di stu paesu.

T'aghju l'ochji brusgiati, a bocca
sicca è ci hè una dunnaccia chì dormi
accant'à mè, sò i testimonii d'una
sirata tremenda. Ma ùn capiscu micca
comu mi sò ritrovu in st'albergu troppu
beddu è caru par mè. Quandu vicu sta

balisgetta piena di biglietti tuttu s'in-chjara. Mi rammentu sta sirata passata à u casinò, stu sintimu di vittoria dopu à st'ultimu colpu degnu di i ghjucadori di poker i più famosi.

M'arricordu di u ventu di furtuna chì suffiaia, m'arricordu dinù di stu falzu sintimu di benestà in a discuteca è po dopu m'arricordu di u ribombu di a me boci cù sta drugata persa. Una sirata di vizio è di piacè, ma mi sentu biotu, cum'è s'è u whisky, u ghjocu è i donni ùn mi faciani più rida... Innò ùn sarà pussibili di campà comu s'è ùn l'aviu cunnisciuta, sò troppu nostalgicu di tutti sti stondi passati cùn idda.

In più saria u ghjornu parfettu par ritruvalla, semu u 24, è stu periodu di l'annata mi dà sempri emuzioni spiciali.

Avali ci socu, semu luntani di a cità, di tutti i lumi mischiati à a niva chì casca dipoi qualchì ghjorna. Campa in a stessa casa, a noscia casa. T'hà a stessa vittura cà l'epuca, missa à a stessa piazza chì tanti anni fà, nudda hà cambiatu.

M'avvicingu pocu a pocu di sta vechja porta di farru stazzunatu, passu davanti u chjarasgiu, fiuritu cum'è mai ùn l'aviu vistu. L'ortu fiuritu ùn hè, ma i pustimi crescini a brastecca, intarrissanti cum'è i me loca campani sempri senza mè.

I dicurazioni sò pochi mà sò beddi, cumu tutti l'anni d'altrondi. U ventu mi faci u rigalu di u muscu di a manghjusa di sta sera. Hè u mumentu di sparta una stonda insemu, di ritruvacci, di festighjà in sta vechja di Natali, di manghjà è di bia cumu mai, aghju cambiatu sò prontu à cummencià una vita nova, finiti i cunnarii, stu 24 di dicembri hè a me sigonda nascita.

Socu davanti a finestra, u legnu brusgia in u caminu, passani à tola, è idda più bedda chì in i me ricordi, tutti l'altri sò quì dinù, a so mamma, i so sureddi, i so ziteddi è ancu u so maritu.

Pichju à a porta è risortu u listinu ch'iddi t'aviani fattu pà Babbu Natali, hè magnificu, i primi filari dicini « Ordini d'ùn avvicinassi mai à menu di 400 metri di a casa di a famidda Johnson, di una scola pubblica o privata, di un parcu, di u locu di travaddu di tutti i cumpunanti di a famidda Johnson. Sarà una sirata maravigliosa, sentu u me fiori. Aveti intesu o zitè? Babbu Natali hè ghjuntu! »

« Flash infurmazioni: Arriserà vechja di natali, un omu hà tumbatu una famidda, st'omu cunnisciutu di i servizii spicializati è di a pulizia ùn t'avia nisuna leia cù i so vittimi, hè sempri ricercatu è cunsideratu cumu pericolosu par a sucetà... »